

L'galo, la diversité linghistiq e l-z eleccion d juin 2021

Lé rejion Bertègn e Payi d la Louèrr – Côt d'Ahaot, Il e Vilènn, Louèrr Atlauntiq, Morbiyan

N'a du mondd qhi s portt pourr lé-z eleccion e qhi s'engaïj pourr le galo e la gârtè langaïjièrr

Den in doqument qhi të titrè « Saovè e ravigotè l'galo » (sauver et revitaliser le gallo) bani l' 14 de mae 2021, **Bertègn Galèzz e l'institut Chubri int-rbolein lé candidat e lé candidat qhi s portt pourr lé-z eleccion rejion-nal e departemental den l'dëmènn de la politiq langaïjièrr**. Den yeû-z ap-l, lé souèton dizein yeû-z analizz su l'câ du galo e su lé bzein d politiq pubblq. E pée i yeû dmaundein d ferr savaer yeû-z aviz su 13 propôziçion d'engaïjment.

A vu lé reponss rçu parr escrit, n'a deûz list qhi senb-l pu qheûru su l'sujit: « Bretagne ma vie » e « Bretagne d'Avenir ». La list « Bretagne ma vie » s'ée la siènn qhi tièn l'pu contt dé-z analizz e dé propôziçion é deûz souèton. Raport é-z engaïjment, la list « Bretagne d'Avenir » rsort puteû bin, paralh. N'a dé sujet inportaunt conm tout q lé deûz list tiènn contt. S'ée vrae pourr l'idée d montè la boursée pourr le galo. En 2021, la boursée-la vao rin q 5,5 du çent d la politiq pourr lé lang de B-rtingn de la Rejion B-rtingn. E sa, s'ée pouint ajustè é bzein pourr protaijè e rdon-nè l'galo, e pée s'ée pouint lojq o l'prinçip d'egalité d tretment. Pourr lé sujet d ghimentè e d sensibilizè l'mondd su l'fètt galèez, i son prinz en contt itou. S'ée ènn bon-n chôzz, raport qe n'a in canaïj qhi'a të fèt en 2018 qhi mont-r qe n'a dvèrr 40 % dé dmeraunt d la contrée istoriq de la B-rtingn qhi sav pouint s qe s'ée l' « galo » ou l' « patouâz ».

Mée n'a deûz sujet q lé list qhi s portt é-z eleccion dizz pouint rin. P-rmièr, n'a pouint ôqhènn list qhi s'engaïj a chouâzi in-n organigram dé dirijou du consalh de la colèctivité departemental ou bin rejion-nal de façon q sa garantirè ènn ap-rch larj de la gârtè langaïjièrr e in tretment du galo qhi srè ajustè a sa seyaunç den la contrée d la colèctivité-la. L'aotr qhéçion s'ée q devlopè la savaunç linghistiq su l'galo (d-z enqhètt oral o lé caozou néssaunç jusq'a la rchèrch linghistiq a l'université) e pée mèt davantaïj le corpuss du parlement a l'amin du mondd (parr dé doqument e dé motiéer en lign, dé-z outi d'egâlment dé cnéssaunç, e nen n sè ti), sa q'aparées pouint conm in pirot espeçia d'ènn politiq pourr le galo. S'ée pâmein en crayaun dé rsourç linghistiq qe nen bâti l'fondment d la protaij e d la rdon-nèzon du galo. A in monment q lé caozou d néssaunç son pourr se nn alè, s'ée pu pôssibl d r-poussè corr la rassèrri d la memouèrr galèzz dé-z ançièn. S'ée dée astourr qe fô aji.

[tournè en galo parr Chubri]

L'ap-l du 14 de mae > [« Saovè e ravigotè l'galo »](#)

L'etudd dé reponss ô 11 de juin > [clliqée don içi](#)

Pourr touchè lé souèton raport a l'ap-l **« Saovè e ravigotè l'galo »** > eleccion@chubri.org

Bertègn Galèzz > Ferme des Gallets, 26 avenue Pierre Donzelot, 35700 Rennes
bertegn-galez.bzh > contact@bertegn-galez.bzh > 02 99 38 97 65

Chubri – institut d'inventaire et d'étude linguistique du gallo > 23 av. de Guyenne, 35000 Rennes
chubri-galo.bzh > chubri@chubri.org > 02 99 84 08 87